

Pablopa Epesodenidsa ima teppe dosse inajaro

Efesios

Epesopi dsama Asiahuaicca odsa panani. Pablopa nahidsa huajano 3 naha madijari. Nahidsa madidsa Jesocristo tahimari maride tojadsapa madija huapi taha Jesodsa toquejenajari. Najaro imapi Roca dsodo inajaro Jesocca dodosse tabaqqi tahimarideni capítulo 19'dsa, 20'dsa naqui anijaro.

Dsotode Pablo dsama onihihuaji madidsapa Epesocca madijadsa ajijaro ima dsodo inajaro. Dio pohuadenidsa huati cahanari canahicca ima denima tocahatterahijine, Dio jipa tahiccara inanamanadsa madimanahijine naqui dsodo inajaro.

Jesocristodsa iquejenadsapi icca madie dsati tojajaro. Imadinissa tanijinecca ima naqui Pablo dsodo inajaro.

Tabaccorehe jinede Satanapa iadsa dissera tajari, imasiri inananijine. Pablocca dsodonijipi ia mari tocanabaqqijaro, dacoco ijiranijine, imasirdsa iedima-geranijine.

Pablo nija najari

1 ¹¿Nija ohuemecotedeni? Occa ima tiadenidsa dsodo onajaro. Ohuapi Pablo. Dio ohuadsa jipa tadsa Jesocristocca dodosse ojanijine otohui huahua najari. Jehe, nani odsa panani Epesodsa timadimanageropi Diocca madija bicaqqiri tiquinani, Jesocristodsa disseraqqiri tiquinajardenidsa dsodo onajaro. ²ICca Abi Dio, Pohua Bedi ia Medsede Jesocristo tedseje tiadenidsa ima bicani inanamana-dsanapona. Pocca-deni jonehe naqui tibodidenidsa tojadsanapona, onajaro.

Jesocristodsa iquejenajarojine ima bicani iadsa anijaro

³Diodsa etti ajima inana: –Jehe Abi Dio, bica tinani, deni tijani. Iadsa ima bicani tinanajaro –ihidsanapo nana. Diopa pajissa ia Medsede Jesocristocca Abi. Jesocristodsa iquejenajarojine ima bicani memehuaji anijaro huapima iadsa da inajaro. Pohua Corimepa ibodidsa najaro ima bicani inanaridsajaro. ⁴Diopa dsama inahatopo-geradsama itohui napojari. Pocca madija iquejenanijine ia tocatejidsabaqqijari. Nama najaria Pohua Bedi Jesocristodsa pajissa inajarodeni ibodi

ssiajaququiri nadsa Dio Pohuatohuira imadinissa dsanaponijine. Ia qqui tabaqquidsapa imasiri icappirani ia qqui tabaqquihitohui. Diopa iadsa huati huana tajari. ⁵Diopa maitta-ccadsama: –Madija medse onabaqquina, pina occa ejedenidenissa quinahijine –napojari nade. Nadsapi Pohua Bedi Jesocristodsa iquejenadsa Dio pocca madija iquejenajaro. Najaro imapi Diodsa bica tani. Pohua tohuini nadsa nema inanajaro. ⁶Nadsama iapi: –¡Jehe Abi Dio, bica tinani, bica tinani! Iapi bicaququiri inejeraraha iadsa ima bicani tinanajaro. ¡Ticca tohuati huanehepi deni tojani! –ihinanajaro. Abi Diopa Pohua Bedi Jesocristodsa huati huana tajari. Najaridsa pajissa inadsapi iadsa ima bicani inanajaro. ⁷Imasiri iadsa dacoraraha Dio itohui huati cahanari canadsa ia tappa tabaqquihijine pocca ejedeni eccorajari. Pohua emene toccajaropi icca imasiri manaconi tojajaro. Nadsapa Dio iadsa: –Ticcadeni imasiridsa epeje onani –najari. ⁸Diopa nema inanajaropi iadsa pocca tohuati huanehe ahuato inanajaro. Memehuajicca nahatohue, tohuattehe huapima naqui iadsa inandaridsajaro. ⁹Diopa iadsa ima bicani inanahijine ecahuapojaropi tahide ahuatora taporaha jidapana iadsa ahuato inanajaro. Najaro imapi Pohua tohuini napodsas: –Occa ejedenidsa ajima onananitohui –napode. ¹⁰Najaroa nidsa dsotode Pohua tohuini nahicca huada bacco tadsa pocca tonahatobaqquinaja huapima aja memehuajicca, namihuajicca naco huapima inatassaqquihitohui. Nadsapa Pohua Bedi Jesocristo

huapimadsa deni inanadsapa pohuana huapima ecahuabaqquihitohui.

¹¹Diopa Pohua jipa tahicca inananijine tohuini nadsa najarossa inanajaro. Tahide madija iquejena-jeraccadsama Diopa: –Madija ocatejidsabaqquihitohui, occa madija toquejenadsa pohuadenidsa occa daniji bicani da onabaqquinijine –napohui nade. Nadsapi Jesocristodsa pajissa inadsa Diocca madija iquejenajaro. Nadsapi Dio pocca daniji bicani huati tapojaricca iadsa inandaridsanitohui. ¹²Dio Pohua tohuini nadsa tahide ia jodiodenina Jesocristodsa pajissa inapojaro. Diodsa etidsedsa Pohuadsa: –Jehe Abi Dio, bica tinani, deni tijani –ihinananijine Dio ia tocatejidsabaqquijopari. ¹³Tiadenipi jodio tiquejena-jeraraha Jesocristo tahimari icassiejeranijinecca timittamanadsapi pajissa tiquinajaro. Nadsapi tiadeni naqui Jesocristocca tiquejenajaro. Nadsana Dio pocca madija tiquejenajaro ahuato tanijine Pohua Corime dosse inaronajari. Pina tahide huati tapojarissa najari: –Nidsa Ocorime tiadenidsa onandaridsanitohui –napohui nade. ¹⁴*Dio Pohua Corime iadsa inandaridsajaripa pocca daniji bicani huati tapojaricca pajissa iadsa tojanitohui nahatoto inahijine. Najaro daniji bicanipi nidsa dsotode pocca madija idinibaqquia jicahissa tadsapa pocca daniji bicani huapimadsa da inandaridsanitohui. Dio nama najaria madija Pohuadsa huatidsemanadsa: –¡Jehe Abi Dio, bica tinani, deni tijani! –quiquinanahijine.

**Pablo Diocca nahatohuetohui
Diodsa huati tajari**

¹⁵Ticcadeni ima omittaponidsama titohuideni Diodsa huati

huati odsanapojaro. Aji ia Medsede Jesodsa pajissa tiquinanissa tajaro ima omittajaro. Diodsa toquejenajari huapimadsa naqui tetideni huanaquiqui najaro quinahi omittadsa ohuatidsejaro. ¹⁶Pajissa Diodsa huatide ojadsapi titohuideni ohuati ajima-jerajaro. Diodsa huati onadsapi: –Jehe Abi Dio, *epejени. Tijine bica tani. Epesodenicca jeheniji bica tadsa ohuatidseni –ohonanajaro. ¹⁷Diopa ia Medsede Jesocristocca Abi bica tajari. Pohnuadsa huati onadsa naqui: –Abi Dio, pohnuadenidsa Ticorimecca tohuattehe, nahatohue tinanaridsaji –ohonanajaro. Pocca nahatohue tibodidenidsa inehemadsapi Diocca pajissehe tiadenidsa ahuato tanijine. Dio naco tiadenidsa tojidserara dsanapohuijine. ¹⁸Diodsa ohuatti onihi naqui: –Abi Dio, pohnuadeni tedsejemacca ima bicani bodidenidsa ahuato tinanaji –ohonanajaro. Diopa pocca madija tiquejenanijine tiadeni huahua tabaqqijari. *Itedsejemacca ima bicani iadsa tojanijine tohuini imadjaropi pajissa iadsa tojanitohui. Najaro nahatoqquri tiquinanijine Diodsa huati huati ohonanajaro. Dio Pohnuadsa toquejenajaridenidsa pocca daniji bicani da inani nahatoqquri tiquinanijine naqui Pohnuadsa huati huati ohonanajaro. ¹⁹Dio pocca dacorehe naqui tiadenidsa ahuato tanijine Pohnuadsa huati huati ohonanajaro. Pocca dacorehepi motarani, jicaqqi-jerani. Najaro dacorehepi Pohnuadsa pajissa inajarodenidsa anijaro. Najaro dacorehepi Dio Pohnuadsa dacoraja najari. ²⁰Diopa pocca dacoreheda Jesocristo

dsocqueraha inahatonijari. Memehuaji iaccamacossanidsa deni inana dsapa Pohnuadsa inori nahatonihuaji inahittarijari. ²¹Nahidsapa memehuajicca, namihuajicca huapima dossede tojajari. Pocca dacorehe deni tojajaro. Pocca cacahuehe jiquejerajaro. Jidapana ajijaro dsamaccadsa deni tojajari. Nidsa dsotodecca dsama dsati ccasonajaro dsaco naco dsanapohuitohui. Pocca deni tojehe jiquejeranitohui. ²²Diopa memehuajicca, namihuajicca huapima ajamani inanaqqijari. Pohnuadsa Bedi Jesocristo deni inana dsapa huapima dossedeni tojajari. Ia naqui pocca iquejenajaro ia dossede tojajari, pina itatissa najari. ²³Ia Cristodsa ijariqqijaropi pina pohnuadsa assiressa inajaro. Iadsa pajirahissa taridsajari. Meme, nami huapimadsa naco pohnuadsa pajirahissa taridsajari.

**Diopa iadsa huati cahanari
canadsa ia tonassiajabaqqijari**

2 ¹Tahidepi ticcadeni tabacorehe, ticcadeni imasirijine Diodsapi pina tecotajarossa najarode. ²Ticcadeni madie pina Diodsa toquejena-jarajaridenissa tiquinajarode. Ajijaro namicca imatohui disseraqquri tiquinadsapi Diocca huadi *Satana attidsana iboraqquri tiquinajarode. Najaripa aja qqui inabaqqi-jarajarideni dossede tojaripaja. Pohnuadsa Diodsa iboqquri najaridenidsa naco dosse dosse najari. ³Ia huapimapi tahide nema inapojaro. Diodsa iboqquri inajarode, ibodidsa tabacorehe tohuini inaniccara ihinana najarode. Ime tohuini inaniccara tabaccora taniccadsa disseraqquri

inajarode. Imasirima issonajarojine Dio ia tonajidso-baqquidsapa pina madija huapima inajidsobaqquijari-sa inanitohuiraha.

⁴Diopa tohuati huanehe sse tajari. Itohui huati cahanari canajari.

⁵Imasiri sseqquiri inajarojinepi pina ecotajarossa inaccade. Naraha Jesocristocca madija iquejenadsapi Diopa iadsa camittehe dsati da inajaro. Pocca tohuati huanehepi bica tani, deni tojani. Najaroma tiadenidsa huati cahanari canadsa tiadeni tonassijabaqquijari. ⁶Madija ia huapima pina ecotajarossa inaraha Diopa Jesocristo inahatonidsa ia naqui pohua tedseje ia tonahatoni-baqquijari. Nadsapi memehuaji Dio Pohuajine Cristo tedseje jassi inarinitohui. ⁷Dio nama najaria nidsa dsotode pocca tohuati huanehe bicani iadsa inanani madija huapimadsa ahuato tanitohui. Aji icca ima Diodsa tobicajaropi Jesocristo pohuajine. Nadsapa Dio iadsa huati cahanari canahi madija qqui toquinahitohui. Najaro ima naqui mittamanahitohui. ⁸Abi Diopa titohuideni huati cahanari canajaria tiadeni tonassijabaqquijari. – Jesocristo pajissa itohui dsoqqejari –tiquinadsapi tiadenidsa tossiejehe inanajaro. Tijinedeni jerani. Abi Dio tohuini nadsa manaconi jirehe tiadenidsa inanajaro. ⁹Pajissa, Dio tiadeni tonassijabaqquijaripa bicaqquri tiquinajarojine jerani. Ima bicani tinanamanajarojine jerani. Najarojine madijapa: –Bica onajarojine Dio ohua tonassijajari –najarahitohui. ¹⁰Diopa tahide nahato tapojari: –Occa tonahatobaqquinaja ima bicanira inanamananitohui. Ohuattidsa

madimanahissa tahitohui –nadsapa Pohua Bedi Jesocristo dosse inaronajari, pohuajine inahatomani-dsati iquejenanijine.

Jodiodeni, jodio quejena-jarajaridenima Cristodsa ijariqquijaro

¹¹Tiadenipi jodiodenissa tiquinehe tissonamana-jerajaropi jodio tiquejena-jerani. *Huissinaja ticappiramehe timadimanadsapi jodiodeni tiadenidsa: –Huissinaja jijiradeni –quiquinanajari. Pohuadenipa najaro huissinaja cajimanadsapa pohuadeni canacanimanadsa: –Iapi huissinaja cajimanajari-deni iquejenani –quiquinanajari. Nama quiquinanadsapa: –Iana Diocca madija iquejenani ahuato tani –quiquinanaraha assiredenidsara ahuato tajaro. Pohuadeni bodidenipa cacajiquimera-jerajaro. Naraha tiadenipi tetideni ajimamana tejerana: Maittaccadsamapi Jesocristodsa nahatoqquri tiquinejeraccade. ¹²Jesocristo jirehe timadimanaccade. Tiadenipi Isaraeri potemahi jodiodenidsa tiquejemanamana-jeraccade. Diopa pohuadeni tedsejera jehe canirepojaride. Pohuadenidsara ima bicani onihi onihi huati tapojari. –Tiadenira onassijabaqqunitohui –napohui nade Abi Dio. Naraha tiadenidsapa nama najarajari. Ajijaro namidsa timadimanaporahe ponima Dio jirehe timadimanadsapi: –Idsoqquedsa icassiejeranitohui –tiquinejeraccade. ¹³Tiadenipi Diodsa huajiji tinaccade. Naraha jdapana Jesocristo pohuajine Diodsa huajijira tinajaro. Pohua dsoqquedsa emene toccajarojinea tijariqquimanajaropaji.

¹⁴ Jesocristo pohuajine icajonerara canajaro. Ia jodiodeni, jodio tiquejena-jerajarodeni huapima ijariqqijaro. Aja jodiodeni, jodio quejena-jarajarideni tedseje ahuaji jipera, ahuaji jipera quinapojaricca imapi Jesocristojine jicajaro. Najaro imapi pina siba hua tamaroni dequerema huajaro idenihuaji jodiodeni, ideni onihihuaji jodio quejena-jarajarideni quinapojarissa najaro. Naraha Jesocristo najaro huattajohuecca ima inajicajaropi pina siba hua tamaroni dequerema huajaro inabararidsa tohuabajarossa najaro. ¹⁵ Diocca dosseniji Moisesi dsodo inapojaropi huapi tajaro. Najarodsa jodiodeni madijonamanajari. Naraha Jeso ahua porimacossanidsa dsoqquedsapa najaro nebojaro. Nama nadsapa aja jodio Jesodsa pajissa quinajarideni, jodio quejena-jarajari pajissa quinajarideni tedseje inatassaquidsapa pohuadsa ojariqquimanajari. Nadsapa pohuadsa ojariqquimanajarideni huapima pohuajine cajonerara canajari.

¹⁶ Jeso *ahua porimacossanidsa dsoqquedsapa aja jodiodeni, jodio quejena-jarajarideni tedseje ahuaji jipera, ahuaji jipera quinajari ima pohuajine jicajaro. Jidapapa cajonerara canajari. Pohuadsa huapima tassaquimanahissa tadsapa pina pohua assire ojarijarissa quinajari. Pohuadsa pajissa quinajarideni huapima Dio tedseje cajoneraripaja. ¹⁷ Jesocristo nami-huaji ccaronajaripa ima bicani Dio tedseje icajoneranijinecca huati huati naridsajari. Jodio tiquejena-jerajaro Diodsa ssamoqquiri tiquinapjarodenidsa najaro ima huati huati najari. Ia jodiodeni

Diodsa nahatoqquiri inajarodeni-dsa naco huati huati najari. ¹⁸ Jesocristo pohuajine ia jodiodeni, jodio tiquejena-jerajarodeni huapima pohuadsa pajissa inadsapi Abi Diodsa iajiranijine ipajirani. Pohua Corime ia huapimadsa anijaripa ojarijari. Najaripa ia acco tocama-baqquids Diodsa huati inadsapi Pohuadsa ia tonahuajira-baqquijari. ¹⁹ Jodio tiquejena-jerajaro tiadenipi pina dsama onihicca madijassa, pina dsama cappiramanajaridenissa tiquinaporaha jidapapi Jesocristodsa pajissa tiquinadsapi Diocca madija tedseje tiadeni naqui pocca odsacca madija tiquejenani. Tiadeni naqui Diodsa: –Abi –tiquinani. ²⁰ Djojine Jesocristodsa tijariqquimanajaro. Jesocristo pocca dodosse tabaqquina Jeso pohua tahimari mari mari ihicanabaqquimana najari. Dio Atti cacomeraqquiri najarideni naco pohua tahimari ehecomeramana nadsa timittamanadsapi pajissa tiquinajaro. Ima nema najaropi pina odsa canahatonijinecca imassa najaro. Odsa sibadsa canahatonijinepi tahide poni cahittanica nami najorapojaro. Dsotodena siba hua tamarohuajani-dsapi odsa tocajajaro. Jesocristocca dodosse tabaqquideni, Dio Atti cacomeraqquiri najarideni tedsejepa pina odsa cahittanica namissa quinajari. Tiadenipi pina siba hua tamarohuajaninissa tiquinajaro. Jesocristopa pina siba bicabotessa najari. ²¹ Pohuadsa jehe tiquinajarodeni pohuadsa tijariqquimanajaro. Tiadeni acco tocamaqquiri, tibodideni denima tobicadsanopnijine. Tibodideni ssiaja, huire tadsa ia Medsede madidsahijine. Pina

Dio pocca odsa bica tocanajarossa tiquinanijine. ²²Jehe Jesocristodsa tijariquimanadsapi pina Dio madihijinecca odsassa tiquinajaro. Dio nahidsa madihijine Pohua Corime tiadenidsa inana-dsanapojari.

Diopa Pablo dosse inajari, jodio quejena-jarajarideni Jesocristo tahimari mittamanahijine

3 ¹Ohuapi Pablo, Jesocristocca dodosse ojajarojinepi toponi cocorodsa ohuedsajaro. Jodio tiquejena-jerajarodeni Diocca madija tiqejenanijine tiadeni mari mari ohocanabaquui naraha occa madija jodiodenina ohuadsa huadimanadsa ohua coro idsimamanajarode. ²Occa ima timittamanadsapi jidapanana nahatoto tinani: Diocca tohuati huanehe tiadenidsa tojani tahimarinini timittamananijine Dio ohua cadossejari. ³Dio pocca ima bicani tahide madijadsa ahuatora taporaha Pohuajine ohuadsa tohuatojaro. Najaro ima badsira tehe tahidehuaji dsodo onapopa. ⁴Najaro hua timanimanadsapi timittamananissa tanitohui. Nadsana: –Pajissa, Pablopa Diocca ima bicani Jesocristo tahimari nahato tajari –tiquinanitohui. ⁵Najaro imapi tahide icca ididenidsama Diojine aniporaha pohuadenidsa ahuato inana-jerajaro. Naraha jidapapi Dio Pohua Corimejine aja pocca dodosse tabaqqui bicaquiri najaridenidsa, Pohua Atti cacomerarquiri najari bicaquiri najaridenidsa naco pocca ima bicani ahuato inana-jaropaji. ⁶Aji Diocca ima bicani najoraporaha ahuatora tapojaropi ajima najaro: Jesocristo pohuajine icassiejeranijinecca ima jodio

quejena-jarajaridenidsa naqui bacco tajaro. Jodio quejena-jarajaridenipa jodiodeni tedseje Jesocristodsa pajissa quinadsapa pohuadsa ojariqquimanajari. Pina pohua assire ojarijarissa quinajari. Nama quina-dsapa jodio quejena-jarajarideni, aja jodiodeni tedseje Jesocristodsa toquejenadsapa Diocca daniji bicani Pohua huati tapojaricca cajimanajari.

⁷Ohuapi bica onejeraraha Dio ohuadsa bica tadsa ohuadsa huati huana tajari. Pocca dacorehe ohuadsa inapajiranissa tadsa ohua cadossejari. Jesocristo tahimari icassiejeranijinecca madijadsa tojanijine maride ojaridsajaro. ⁸Jesocristodsa toquejenajarideni mota huapi taha bicaquiri naraha ohuapi bica onejerani. Occa ima jadanipi tabaccora tade. Ohuapi Diocca madija huapimadsa ajimani ojani. Nema onaraha Diona ohuadsa bica tajari. Ohua tocattejidsadsapa todsepe ijie bicani ohuadsa da inajarode. Najaropi aji jodio quejena-jarajaridenidsa Jesocristo tahimari icassiejeranijinecca ima bicani maride occaridsanijine. ⁹Dio ia Nahatode Pohuajine maittaccadsama pocca ima bicani najoraporaha ahuatora tapoccade. Jidapana najaro ima tohuatodsapi madija huapima mittamanahijine maride ohua cadossejari. ¹⁰Diopa nama najaria jidapana pocca madija Jesocristodsa quequeri-quimana najarideni Dio pocca nahatohue bicani jiquejeranicca ahuato inanamananijine. Nadsapa memehuaji cacahuehe cajimanajarideni, pina Diocca dodosse tabaqqui taminedeni, pina innocodsa qqii

inabaquui-jarajaridenicca taminedeni huapima Diocca nahatohue qqui toquinadsapa: –Pajissa, Diopa nahatojide rajari –quinahijine.

¹¹Dio nama nahijinepa dsama inahato-jeraccadsama: –Nidsa dsotode ajima onananitohui –napojari. Nadsapa ia Medsede Jesocristo ocasserani ahuadsa ia Tonassiajade tojadsapa Diocca ima najorapojarocca pajissa tojajaro. ¹²Nadsapi Jesocristo ia Tonassiajadedsa pajissa inadsapi icappina-jeradsa Diodsa iajressijaro. Puhuadsa huati inadsa ibodipi: –Pajissa etti mittahi –inajaro. ¹³Nadsapi toponi cocoro onahanaraha Dio tinebomanajarajo. Jodio tiquejena-jerajarodeni Jeso tahimari tiadenidsa tojanijine maride ojadsapu ohua coro idsimanaraha pina tetidsemanaji. Aji ocasserani ohuajaropi tiadenidsa ima bicani tojanijine.

Pablo Epesodenitohui Diodsa huati tajari

¹⁴Jehe nadsama Dio iadsa ima bicani inanajaro obodi huatomadsapi opitodsa ohuittadsa Puhuadsa huati huati onajaro. ¹⁵Memehuaji animanajarideni, namihuaji animanajarideni huapimapa Dio inahatobaquujari, inajaro. ¹⁶Diopa ojarihi bica taja, nahatojide raja nadsapa Puhuadsa huati onadsapi: –Abi Dio, Ticorimema ticca madija bodideni todacoramanahi nahijine ticca dacorehe tinanaridsaji –ohonanajaro. ¹⁷Jesocristodsa pajissa tiquinadsa tibodidenidsa madihijine Diodsa huati huati onajaro. Diocca tohuati huanehema timadimananijine naqui Puhuadsa huatide dissera onajaro. Pina ahua

jabo nami bodihuaji toqquedsima-jarissa tiquinaji. Tijabodeni Diocca tohuati huanehedsa denima toqquedsima-dsanapodsapi Diodsa tetideni huana tanijine, timecotedenidsa naqui tetideni huana tanijine. ¹⁸Tiadeni, ia inajaro huapima Diocca madija iquejenajaro. Diocca tohuati huanehe nahatoqquri inanijine Puhuadsa huati huati onajaro. Jesocristo itohui huati cahanari canahi tahimari deni tojani. Pocca tohuati huanehepi motarani. Dsama nemanehedsa ijiridsajaro. ¹⁹Pocca tohuati huanehe deni tojarojinepi nahato inanissa tanijine ipajira-jeraraha tiadenidsa ahua to tanijine Diodsa huati huati onajaro. Pocca tohuati huanehe tiadenidsa tojidseradsapi Dio tiadenidsa anihissa tahijine, onajaro.

²⁰Nadsapi Dio deni tojaridsa etidsena. Pocca deni tojehe, pocca dacorehe nemanehapi ibodidsa anijaro. Najarodsa ima bicani inananiijine ipajirani. Tohuini inanicca Puhuadsa huati inadsapi iadsa inana tani. Naraha ibodi huatomajaropi ajimani. –Diopa ajama nahijine pajirahi –inanitide naraha Puhuapa denima inananiijine pajirahi. ²¹Ia huapima Jesocristodsa ihiqueriqui najaropi Diodsa etidsedsa: –¡Abi Dio, bica tinani, deni tijani! –inanijine bica tani. Jidapanadsama nema idsanapona, onajaro. Pajissa nema nana.

Dio Corimejine ijariquijaro

4 ¹Jehe ohuapi ia Medsede Jesocristo tahimari mari mari ohonaridsa najarojine toponi cocoro onahanajaro. Tiadenipi Dio pocca

madija tiquejenanijine tiadeni huahua tabaqqijari. Nadsapi timadimananissa taji. Ticcadeni madie pina Dio tohuini nahiccassa tinamanana, onajaro. ²Tibodidenidsa: –Ohuapi ajimani ojani –tiquinani bica tani. Joneqquiri tiquinadsa tettideni bica tadsa huati huati tiquinana. Timecotedeni tedseje tetideni cahanerara canadsa amadsati tedimana-gerana. Madija tiadenidsa nacassera tadsa naco pina *mohuara-da tinahanamanana, onajaro. ³Dio Corime tiadeni acco tocamabaqquidsa tijariqquimananissa taji. Najarossa tidsanapomananijine disseraqquri tiquinaji. Ticajonerara canehe timadimanadsapi nema tidsanapomananijine tipajiramananitohui.

⁴Ia huapima Jesocristodsa iquejenajaropi pohuadsa ijariqqujaro. Pina pohua assire ojarjarissa inajaro. Dio Pohua Corime iadsa anijari naco ojarahi. Itedsejemacca ima bicani tohuini imadijaro naqui ojarini. Najaro iadsa tojanijine Dio ia tocattejidsabaqqujaripaja. ⁵Ia Medsedepa ojarahi. Najaripa Jeso. Pihuadsara jehe inajaro. Pihuadsa iquejenani ahuato tanijinepi ojarini. Najaropi passodsa ia topa dsanajaro. ⁶icca Abi Diopa ojarahi. Pihuapa huapimacca Abi memehujicca Pihuadsa iquejenajaro. Pihuana ia tohuacahua-baqqujari, ia Cacahuade deni tojahicca. Pocca dosseniji Pohua tohuini nahicca ia cadossedsapa najarossa inana tani. Pihuapa huapimadsa madiridsajari.

**Jesocristocca daniji idsepe
ijinijinecca onihi, onihi
ibodidsa inanaridsajaro**

⁷Ia huapima ijariqqujaroraha idsepe ijinijinepi onihi onihi

icajiridsajaro. Dio Pohua tohuini nahiccassa inanaridsanijine Jesocristo ia huapimadsa da inabaqquiridsajarode. ⁸Najaro imassa najaro Dio Atti dsodo nanidsa dsodo napojaro:

–Memehujari toccamacossanidsapa pohua dsepedsa toquejenajarideni iaccamacossanibaqqujari.

Nadsapa pocca madijadsa pocca daniji da inabaqquiridsajaro –nani nade Dio Atti dsodo nanidsa.

⁹Naraha –Toccamacossanishi –inadsapi çima nejecossa najaro? Jehe, najaro tohuattijine ibodi huatomajaropi tahidepa namihuaji ccaronapojari, inajaro.

¹⁰Aja ccaronapojaripa Jesocristo. Najari pohua toccamacossanijaria memehujari madihi paja naccahi. Meme, nami huapimadsa Cristopa aniridsajari. ¹¹Nadsama madijadsa da inaridsajaropi dsepedeni ijimanahijine inanaridsajaro.

Ohuahadenipa Jesocristo pocca dodosse tabaqqi toquejenahijine inanabaqqujari. Ohuahadenipa Dio Atti *huati iquima-mananijine inanabaqqujari. Ohuahadenipa Dio Atti ecomeramana-ridsadsa Jesocristo pohuadsa jehe quinahijine dosse inabaqquiridsajari. Ohuahadenipa Diocca madija cacahuade toquejenahijine inanabaqqujari. Ohuahadenipa Dio Atti mamaride toquejenahijine inanabaqqujari.

¹²Nama nadsapa Jesodsa toquejenajarideni inapajirabaqqujari, Diodsa dsepedeni ijimanahijine, imecotedeni acco icamabaqqi-manahijine. Nadsapi Jesocristo pohua assiressa inajarodeni icca jeheniji denima

todacorani nanijine. ¹³ Icca jeheniji todacorani dsanapodsapi nidsa dsotode ia huapima Jesocristodsa jehe inajarodeni ijariquinnissa tanitohui. Dio Bedidsa inocco tojidseranissa tadsapi pohuadsa nahatoqquiri inanitohui. Nadsapi denima denima Dio jipa tihicca icahattera-dsanapodsapi pina jadahidene nahatoqquiri najari-ssa inanitohui. Diocca nahatohue icajinitohui. Icca madie pajirani-ssa tanitohui. Pina Jesocristocca madie bica tajarossa nanitohui. ¹⁴ Icca jeheniji dacoradsa Diocca nahatohue icajidsapi ibodi huatohue pina ejedeniccassa nejeranitohui. Ejedenipa tocattera-jaraccadsa bodidene huatomanahissa tahijine pajiramana-jarahi. Pina jojodejine ppahua tajari ahuaji tocca, ahuaji tocca najarissa quinajari. Ejedenipa marinaja onihidsa, onihidsa toquejena tahi. Aja madija maidsehe huatide nahatoqquiri najaridenipa ejedeni icamaidsabaqqi-manahijine pohuadenidsa najora tani. ¹⁵ Naraha iapi Diocca marinaja pajissaccadsana jehe inajaro. Najarodsa imadijaro. Imecotedenidsa eti huana tadsapi pohuadenidsa ima pajissara huati huati inajaro. Nema inadsapi icca madie tobicadsanaponitohui. Pina Jesocristocca madiessa nanitohui. Jesocristopa pocca iquejenajaro ia Dossedede. Pina itati essire dosse dosse najarossa najaro. ¹⁶ Itati essire dosse dosse najaropi iccaridsanijine, idsepe ijiniijine, ijipaniijine najaropaji. Essirepi ojariraha nanidsa tohuariridsanipi huapi tani. Pina idsepe, ibiji, emori, isso najaropaji. Huapima ojariquidsapi essire

dacorajaro. Najaro imassa najaropi ia huapima Jesocristodsa ijariquidsapi idacorajaro. Idsepe ijie onihi onihi icajiraha imecotedeni tedseje acco acco icanadsapi pina essire napijarossa inajaro. Eti cahanerara canadsa naqui icca queriquinaja todacorani najaro.

Jesocristojine madie dsati icajijaro

¹⁷ Jehe, nadsapi ohua Medsedede ohua cadossedsapa pohua onima tiadenidsa huati onajaro. Ohuattissa tinanamanaji. Tahide timadimanapodsapi ticcadeni tabaccorehema timadimanaccade. Naraha jidapana Diocca tiquejenadsapi pina Diodsa toquejena-jarajaridenicca madiessa tinanamana-jeraji. Pohuadenipa pohuama madimana-dsanapojari. Bodidene huatomanahijine ssamoqquiri najari. ¹⁸ Bodidene dsidsi tajarojine mittamana-jarahi. Dio Atti ssamoqquiri nadsapa Diocca madie bicanidsa huatidsemana-jarajari. Bodidenidsa ibohue dacorajaro. ¹⁹ Najaro ibohue pohuadenidsa dacoradsapi tabaccorehe inamananijine disseraqqiri najari. Huananehe huapima ihinanaridsamana najaro. Najaro tabaccorehe pohuadene idimanaraha epejena quina-jarajari. Denima tohuini dsanapomanajari.

²⁰ Naraha tiadenipi nema nanicca tabaccorehe Jesocristocca marinajadsa ticahattera-jerani. ²¹ Pocca marinaja pajissacca timittamanadsapi timadimananissa tanijinena ticahatterajaro. ²² Nadsapi najaro Jesocristocca marinaja ticahatteradsapi ticcadeni madie jadani aji tiadene tohuini tiquinapjaroccapa

tinebomanaji. Tabaccorehe tohuini tiquinajaropi tiadeni tocamaidsa-baqquijaro. Najaro tabaccorehepi tiadeni tonatabaccorajaro. ²³Tibodideni tecajiqquimeramanaji. Diosda: –Occa ima jadani tohuini onejeranijine obodi dsati tinanaji –tiquinaji. ²⁴Nadsapi Dio tibodideni dsati inanadsapi ticcadeni madie naqui dsati tojanitohui. Diopa pina pocca imassa nehe timadimananjine tiadeni acco tocamabaqquihitohui. Diocca imapi pajiranissa tajaro. Puhuapa imasiri cappirajari. Pocca pajissehedsa timadimanadsapi pina Puhuassa tiquinanitohui.

²⁵Jidapana dsati tiquejenadsapi denima timaidsamana tejeraji. Timecotedenidsa ima pajissara huati huati tiquinaji. Ia huapima Jesocristocca iquejenajaropi pina essire ojariqquijarossa inajaro.

²⁶Tedimanadsapi imasiri tinamana-jeraji. Tedimanaraha najaro huadadsa tetideni ssonani bica tani. ²⁷Ticcadeni jamie tinebomanajeradsapi paji, imasiri totonanade Satanajine tabaccorehe tinanamarana, onajaro.

²⁸Madija boti tajaripa pocca botie nebona. Tarabadsa bica taniccadsa dsepe ijidsapa cappira-jarahitohui. Cappiramanajaridenidsa da inahijine naco pajirahitohui.

²⁹Tohuatti tabaccora taniccapi huati huati tiquinejeraji. Tohuatti bica taniccara huati huati tiquinaji. Nema tiquinadsapi timecotedeni bodideni acco ticamabaquidsa jehenijirideni todacorani nanijine. Tettideni bica taniccara mitta-manadsapa bodideni huatidsemanahijine. ³⁰Dio Corime oji

tinanamana-jarahijine timadimananissa taji. Jesocristodsas jehe tiquinapodsama Dio Corimepa tiadenidsa anijonahi. Nadsapa nidsa dsotode Dio pocca madija inassijabaqquihijinecca huada bacco tadsapi Puhua Corime anijaridenidsa: –Occa –nahitohui. Nadsapa najaridenina inassijabaqquihijine.

³¹Ocasserani temanadsapi oji tidsanapomana tejeraji. Ticcadeni huadie denima dacoranicca naqui tinebomanaji. Huadie ajimanicca naqui tecahuamanadsanapo-jeraji. Amossinidsa atti atti tiquinajaro, tatamasso tiquinajaro naqui tinebomanaji. Tabaccorehe onihi onihi naqui tiadenidsa nohueranijine tinebomanaji, onajaro. ³²Tetideni cahanerara canadsa timecotedeni pina acco acco titicamabaqquimana najo. Timecote tiadenidsa ima bica tejeranicca inanadsa naqui poadsa: –Epeje, ohuadi-jerani –tiquinaji. Tiadeni naqui ima bica tejeranicca tinamanadsapi timecotedeni tiadenidsa: –Epeje, ohuadi-jerani –quinahijine bica tani. Pina Diopa Puhua Bedi Jesocristodsas tiquejenadsapi tiadenidsa: –Epeje, ticcadeni imasiri ohuati ajimani –najarissa tiquinaji, onajaro.

Diocca madija madimanahissa tahijinecca ima

5 ¹Jehe tiadenipi Diocca ejedeni tiquejenajaro. Puhuapa titohuideni huati cahanari canajari. Pocca ejedeni tiquejenadsapi Puhujine-ssa tinamanana, onajaro. ²Pocca tohuati huanehema huapima tohuideni tetideni cahanariri canaji. Jesocristo itohui huati

huana tadsapa pohua ccaccoradsa dsoqqejari. Najaro pocca *danijipi Diodsa bica tajaro. Pina bani bedi Diodsa da tahi botta tadsa majo ocassa tajarissa najaro.

³Tiadeni Diodsa tiquejenajaropi huananehe huapima tinanamana tejeraji. Tettidenidsa naqui huananehecca huatide nohuerana. Tabaccorehe oppina tanicca onihi onihi Diocca madijadsa nohuera-jaro. Madijacca tarabadsa acconi, todsepetaji acconi naqui tedi-mana tejeraji. Dsiniro, todsepetaji huemani tohuini tiquinejeraji. Diocca madija tiquejenadsa timadimananissa tanijinepi nema nanicca ima huapima huati tiquina tejeraji.

⁴Ima ponima tabaccora tajaropi huati tiquina tejeraji. Tohuatti ponimacca, jidsehe tabaccora tanicca naqui huati tiquina tejeraji. Nema nanicca tohuatti tabaccora tajaropi Diocca madijadsa nohuera-jaro. Tettideni bica tanicadsara Diodsa tetidsemanana. –Jehe Abi Dio, bica tinani –titidsanapomana nanina bica tani. ⁵Ajijaro ima nahatoqqiri tiquinani: Huananehe inanamanajarodeni, tabaccorehe oppina tanicca inanamanajarodeni huapimapa Cristo, Imehi Dio tedseje poccadeni cacahuehedsa bacco toquina-jarahitohui. Denima tohuini quinajarideni naco pina dsiniro tohuini, pina todsepetaji tohuini quinajari, najarideni huapimapa Cristo, Imehi Dio tedseje poccadeni cacahuehedsa bacco toquina-jarahitohui. Nama quinajaridenipa pina siba nahatonidsa huatidsemanajarissa quinajari. Namicca tohuinira huatideni huanaqqiri najari. Diodsa huatideni huanaqqiri

najarajari. ⁶Paji, madija tiadeni tocamadsabaqqi-manarana! Tohuatti ponimacca huati huati toquinadsapa pina: –Tabaccorehe tinanamanani oppina tejerani. Dio tiadeni tonajidsobaqqi-jarahitohui –quina tahi. Naraha najarideni attidenidsa pajissa tiquinejeraji. Dio Attidsa iboqqiri najarideni huapimadsa Diocca najidsohue oppina tanicca ssonarinitohui. ⁷Nama quinajaridenidsa tiquejemamana tejeraji. Pohuadenidsa tiajimanani nanina bica tani.

Ssajianidsa imadijaro

⁸Jehe tabaccorehedsa timadimanapodsapi Dio jirehe timadimanajarode. Pina dsidsinidsa timadimanajarossa naraha Jeso-cristodsa tiquejenadsapi Dio tiadenidsa tojidserajari. Jidapapi ssajianidsa timadimanadsapi pina Dio ssiejenedsa madimanajaridenissa tiquinana. ⁹Nema tiquinadsapi Dio Pohua ssiejene tibodidenidsa tossiajabaqqiहितohui. Najaripa Pohua Corimejine biquehe tinanamanajaro, ticcadeni ima pajiranissa tajaro, pajissadsara timadimanajaro. ¹⁰Dio Pohua jipa tahicca ticahatteraji. Pihuadsa bica tanicca nahatoto tinadsapi najarora tinanaridsamananjine. ¹¹Aja dsidsinidsa madimanageridenipa ima bicani tonanade ssamoqqiri najari. Pohuadenipa ima ponimacca, tabaccora tanicca inanamanaraha tiadenipi pohuadenidsa tiquejemamana tejeraji. Pohuadenijine tabaccora tajaropi ahuato tinanamananina bica tani. Pina ssiajanihuaji joca tininebaqqi-manajarissa tiquinana.

¹²Pohuadenipa ahuatorehedsa tabaccorehe inanamanajaro. Poccadeni tabaccorehecca ima ecomerani-jinepi iadsa oppina tani. ¹³Naraha tabaccorehe inanamanajaroDsa Dio ssiejene ssonariridsadsapa poccadeni tabaccorehe nemaneha ahua to tanitohui. ¹⁴Dio ssiejene-jine huapima tohuatonissa tajaro. Najarojine maittaccadsama ajama quiquinanajari:

–¡Tedajaro nocco tijaji!

¡Tetiara ha ticamittemaniji!

Cristo pohua ssiejene tibodidsa ssiajaridsanitohui

–quiquinanajari, jiri jiri quinadsa.

¹⁵Nadsama timadimananissa tanijine tibodideni huatonissa dsanapona. Pina ssamoqquri najaridenicca madiessa tiquinejerana. Nahatoqquri najaridenissa tiquinana. ¹⁶Jidapapi tabaccorehe caji taridsanidsa timadimanaccajaro. Naraha tiadenipi ima bicanira tinanamananijine tinajoramanehe timadimanaji. ¹⁷Pina ssamoqquri najaridenissa tiquinejeraji. Ia Medsede tohui nahiccara timittamananissa tanijine disseraqquri tiquinaji. ¹⁸Tinoccodeni jano tanijine coma tanicca dsemana tejerana. Dse tiquinadsapi ticcadeni madie totabaccoranitohui. Ajima tiquinanina bica tani: Dio Pohua Corime tiadenidsa tojahijine Pohuadsa: –Ticorime ohuadsa tinanajo –tiquinana. Nema tiquinadsana ima bicanira tinanamananijine Dio Corime tiadeni dosse dosse nahitohui. ¹⁹Nama nadsapa timecotedeni tinahatidse-baqqimanahijine jiri jiri tiquinaji. Aji Dabicca jijiricca bica tani, aji Dio

Atti dsodo nanicca jijiri naqui bica tani. Dio Corime tibodideni tonahattabaquidsa naqui jiri jiri tiquinani bica tani. Tettideni, tibodideni nemanehema ia Medsede Jesocristodsa jiri jiri tiquinadsa naqui pohuadsa: –¡Bica tinani, deni tijani! –titidsanapomana naji. ²⁰Huajijiradsa ia Medsede Jesocristo onima Abi Diodsa: –Jehe, epejeni. Tijine bica tani –titidsanapomana nana. Nadsapi imadinnica huapima icajidsa, icappiradsa naqui Diodsa: –Jehe, epejeni –inani bica tani. Ima bica tanicca iadsa anidsa, ima ocassera tanicca anidsa naqui nema nehe Diodsa: –Jehe, epejeni –inani bica tani.

**Maqquidejeja bedimeni
tadsajani madimanahissa
tahijinecca ima**

²¹Jesocristodsa tetideni huanaqquri nadsapi pina Jesocristo pohua ajamani tonanajarissa tiquinaji. Timecotedeni tedseje tetti-denidsa ahuaaji ibora, ahuaaji ibora tiquinaji.

²²Amoneje maqquideje ticajimanajarodeni naqui ticcadeni maqqi attidsa iboraqquri tiquinana. Pina ia Medsede Jesocristo attidsa iboraqquri tiquinajarossa tiquinana. ²³Amoneje cajijaripa pocca amoneje dossede tojajari. Pina Jesocristo pohuadsa toquejenarideni dossede tojari-ssa najari. Pohuadsa toquejenaridenipa pina Jesocristo assiressa quinajari. Pohua naco pina pohuadeni tatissa najari. Pohua naco pohuadsa toquejenarideni Tonassiajade. ²⁴Nadsapi maqquideje cajimanajarodeni ponidenicca

maqqui atti nemanehedsa ibora-qquiri nana. Pina *Jesocristodsa quequeriquimana najarideni pohuadsa iboraqquiri najarissa quinanjine, onajaro.

²⁵Maqquideje amoneje ticaji-manajarodeni naqui ticcadeni amonejedsa tetideni huanaqquiri naji. Pina Jesocristo pohuadsa iquejenajaro itohui huati huana tajarissa tiquinaji. Pihuapa itohui huati huana tadsa dsoqqejari. ²⁶Nama najaripa pocca madija ibicaridsanijine. Pohua attidsa ibodi inahirejaro. Tabaccorehe inebojaro ahuato tanijine naqui passodsa totopa icajijaro. ²⁷Icca ima huire, ibodi ssajaja tadsa icca ima pajiranissa tanijine. Pina etero bicabote obero tajarossa, casinaqqui-jerajarossa inanijine. Nidsa pohua ccanipomadsa pohua pocca iquejenajaro bicaqquiri inadsa ia tohuaccamacossanibaqquihijine.

²⁸Nadsama maqquideje amoneje caji-jaripa pocca amonejedsara huati huana tana. Pina pohua pohua assiredsa huati huana tajarissa nana. Pocca amonejedsa huati huana tajaripa pohua pohuadsa naco huati huana tajari. ²⁹Madijapa pohua assiredsa nacassera-jarajari. Pohua assiredsa huati huana tadsapa jijipa najari, pohua assire cacacahua najari. Jehe najaro imapi pina Jesocristopa pohuadsa toquejenarideni ecahuabaqquijarissa najaro. ³⁰Ia huapima pohuadsa iquejenaropi pina pohua assire namanahassa inajaro.

³¹Ima najarossa najaropi maittaccadsama Dio huati tajari: –Maqquideje pohua bedimenidsa tojadsapa imehi imenidenidsa

nebo, pohuadenira madimanajari. Nadsapa pamaraha pina ojarijarissa quinajari –nahi nade Dio. ³²Najaro imapi assiredeni pamaraha pina assire ojarijarissa naha toquejenajari. Najaro cajicajicca imapi imittaporaha ahuatora taccade. Naraha jidapanana omittadsapi Jesocristodsa ijariqquijarocca imapi pina cajicajicca imassa najarona paji, onajaro. Najaro imapi ohuadsa bica tajaro. ³³Nadsama tiadenidsa huati omanipomajaro: Maqquideje amoneje cajimanajaridenipa poccadeni amonejedsara huatideni huanaqquiri nana. Pina pohua pohuadenidsa huatideni huanaqquiri najarissana. Amoneje maqquideje cajimanajarodeni naqui ponidenicca maqquidsara iboraqquiri nana, onajaro.

Imehideni bedideni tedseje madimanahissa tahijinecca ima

6 ¹Ejedenideni, tiadenipi ia Medsede tohuini nahiccara tinanamanani bica tanijinepi ticcadeni abi, ami attidenidsa iboraqquiri tiquinaji. Najarona ima pajiranissa tajaro. ²Dio Atti dsodo nanidsa ajima najaro: –Ticcadeni abi, amidenidsa tetideni huanaqquiri naji –nahi nade Dio Atti. Najaro dosse-nijipi Dio pocca dosseniji 10 nehe Moisesidsa da inajarodsa anijaro. Najaro dosseniji ojarie da inadsapi ima bicani tadsajani huati tapojari. Nadsapi najaro dosseniji ecahuadsapi ima bicani iadsa tojanitohui. ³Najaroa aji Pohua Atti: –Tiadeni onamadibaqquinissa dsanaponijine. Ajijaro namidsa timadimanadsapi jadahi tiquejenanissa tanitohui –nahi nade Dio Atti.

⁴Jehe, imehideni tiadeni naqui ticcadeni ejedeni tijinedeni huadimana-jarana. Madie bicani tocahatterahijine tedimana-jeradsa tinahattabaquimanajo. Ticcadeni ejedeni Dio Pohua tohuini nahicca tocahatterahijinera mari mari titicanabaquimana nana.

**Madijacca dodosse
tabaqquidenipa pohuadeni
dossedede tedseje madimanahissa
tahijinecca ima**

⁵Nadsapi *madijacca dodosse tiquejenajaro, tiadeni naqui ajiaro namicca tiadeni dossedede attidsa iboraqquri tiquinaji. Pohua noppine ticappinamanadsa pohuadsa bicaqquri tiquinaji. Maidseraqquri tiquinadsa tidsepedeni ijimananissa taji. Pina Jesocristodsa tidsepedeni ijimanagerossa tiquinana. ⁶Tiadeni dossedede qquri tajaradsa naco tidsepedeni ijimananissa tana. Pina tiadeni qquri tadsassa tiquinaji. Pina Jesocristocca dodosessa tiquinana, Dio jipa tahicca titinanamana nanijine. Tiadeni dossedede attidsa naqui iboraqquri tiquinana. Tibodideni bicaqquri nadsa: –Jehe, ohua dossedede attidsa ibora onana –tiquinana. ⁷Nadsapi huatidsehema tibodideni bicaqquri nadsa tidsepedeni ijimanana. Nema tiquinadsapi tiadeni dossedede madijaraha pohuadsa tidsepedeni ijimandsapi pina ia Medsededsa tidsepedeni ijimanagerossa tiquinajaro. ⁸Ajiaro ima nahatoqquri tiquinajaro: Nidsa ia Medsede Jesocristo ccanidsapa ima bicani tinanamanajaro manaconi tiadeni huapimadsa da inabaqqunitohui. Nama nahitohui dodosse tiquejenajarodenidsa, dodosse tiquejena-jerajarodenidsa naqui.

⁹Nadsama dodossededeni. Tiadeni naqui ticcadeni dodosse tabaqquidsa bicaqquri tiquinaji. Pina Jesocristodsa bicaqquri tiquinajarossa tiquinaji. Ticamaidsabaquimana tajarajo. Jara tinabaquimana tajarajo. Tibodideni huatoma-manaji: ticcadeni dodosse tabaqqui pohuadeni Medsedepa tiadeni Medsede Jesocristo ojarihi. Pihuapa tiadeni Cacahuade memehuaji madijari. Pohua attipa: –Ajaridenipa dodossededeni toquejenajari, ajaridenipa dodosse toquejenajari –najarajari. Qqui inabaquidsapa huapima najarissa canirejari.

**Diocca dacorehe
icajidsapi imasiri iadsa
deni toja-jeranjine**


¹⁰Ohuemecotedeni, jidapapi occa marinaja jicanicca tiadenidsa dsodo onajaro. Ia Medsedepa dacorajari. Pocca dacorehepi deni tojanicca. Najaro pocca dacorehema dacoco tijiraji. ¹¹Pina soldadossa tiquinaji. Soldadopa biquerahi noppine pohua cacahuahijine jadsirecca huedsajari. Tiadeni tecahuamananjinepi Diocca dacorehe ticajimanaji. Nema tiquinadsapi *Satanacca maidsehedsa tiedimamana-jeranitohui. Dacoraqquri tiquinadsa tidomodeni huanitohui. ¹²Imasiri deni toja-jeranjinepi jadsire inanajarossa najaro. Naraha icahadirenjinepi madija assire cajimana, tone cajimana najarideni tedseje jerani. Pohuadeni assire cappiramanajari qqui inabaqqui-jarajideni tedsejena icahadirejaro. Najaridenipa tabacorehe jinede Satanacca dodosse tabaqqui memehuaji jahiridsajari.

Memehuari madimanaraha ajjaro namidsa dacorehe cajimanajari. Pohuadenipa dsidsinidsa madimanajarideni ihicadosse-baqqi-manajari, tabaccorehe inamanamanijine. ¹³Nadsama Satanacca dodosse tabaqqidsa jadsire tinamanamanijinepi Diocca dacorehe nemanehet icajimanana. Nadsana tabaccorehe ahuatodsatiedimamana-jeranitohui. Imasiritadsajanicahadiredsapi dacocotijradsatidomodeni huanitohui.

¹⁴Nadsama tiadenipi dacoraqquri tiquinaji. Pina soldadossatiquinaji. Soldadopetero jadsirejinecca huedsajari. Narahatiadenipi Diocca pajissehe, pocca biquehetedsamanaji. Najaro ima pameheticajimanadsapimasiritadsajanicahadiredsatidomohuanissatanitohui. ¹⁵Jesojine Dio tedseje icajonerajarocca ima bicanimaridedisseraqquri tiquinaji. Najaro imatecomeraridsamananijinetinajoramehetimadimanaji. ¹⁶Imasiritadsajanicahadirenijinepi ticcadenijehenijidacorajaro pinasoldadoccamatassanajaro. Soldadopabobadsabiquerahinoppinessapa, ccara tajari pohuatjedsejema da inajari. Tiadeninaquijehetiquinanissatadsapitabaccorehejinedecca bobajororone cajihicadsatibiqueramana-jeranitohui. Pocca maidsehe iadsa ssonarijaropipina ia ssitenajarissanajari. ¹⁷Jesotahimari icassiejeranijinecca ia tohuacahua-baqquijaropipinasoldadopohuatitacahuahijineccaratajari ettarijarissanajaro. Tabaccorehetadsajanicahadirenijinenaquidiodio Pohua Corime Bicabotetibodidenidsa Pohua Atti inanajaro.

Najaropi pinajadsirecca massitojadsira tocanajarossa najaro.

¹⁸Huajjiradsa Diodsa huatihuati titiquina naji. Pohuadsahuatide tinebomana tejeraji. Dio Corime tibodideni acco tocambaqquihitohui. Tetidenihuatodsatinoccodeni panehetimadimanaji. Pina soldadopocca huadinoppinideninocco panajarissatiquinana. Tiadenidsa ima bica tadsa, ocassera tadsanaquidiodsa huatidedisseraqquri tiquinaji. Diodsa toquejenajaridenihuapimatohuidiodsa huatihuati titiquina naji.



¹⁹Otohui naquidiodsa huatihuati titiquina naji. Nani ocappina-jeradsa Jesocristo tahimari icassiejeranijinecca maride ojadsa tohuattipajiranissatanicadsamadijamari ocanabaqquiridsahijine. Najaro imabicanipitahide Djojine

ahuatora taporaha jidapana Pohua-
jine tohuatojaro. ²⁰Najaro pohua
tahimari mari onaridsanijine ohua
Medsedepa ohua cadossejaride.
Najarojine jidapapi todsepe ojararo.
Dio Pahuadsa huati huati tiquinaji,
cappinehe ohuadsa nohueradsapi
pocca dossehe onapajiranissa
tanijine.

Pablocca ima jicanicca

²¹Ti quicopa imecote bicabote.
Pohuapa aji omadinicca, nomi
onanicca, odsepe ijiecca huapima
tiadenidsa huati tahitohui. Pohuapa
ia Medsede Jesocristodsa ibora
tadsa pohua tahimari maride
dissera tajari. ²²Pohuapa itahimari

tiadenidsa huati tahijine tiadeni-
huaji dosse onajari. Pohua naco
tiadeni tonahatidsebaquidsa
tibodideni acco tocamabaquid-
hitohui.

²³ICCA ABI DIO, IA MEDSEDE JESO-
CRISTO TEDSEJE AJI TIJARIQUIMANAJARO
TIADENIDSA JONEHE INANAMANANA.
HUAPIMADSA HUATIDENI CAHANARIRI
CADSANAPONA, ONAJARO. POHUA-
DENIDSA JEHE TIDSANAPOMANANIJINE
NAQUI TIBODIDENI INADACORA-BAQUID-
MANANA, ONAJARO. ²⁴IA MEDSEDE
JESOCRISTODSA TETIDENI CAHANARIRI
CANANI DACORADSA TIADENIDSA POC-
CA BIQUEHE TOJADSANAPONA, ONAJARO.

Epejeni occa ima.
Ohua onipi Pablo.